



Vrijednost i važnost namaza (Medina)

Hatib: dr. Abdullah ibn Abdurrahman el-Buajdžan

22. rebiul-ahir 1446. god. po Hidžri / 25. oktobar 2024.

Hvala Allahu, Njega hvalimo, od Njega pomoć tražimo, i Njemu se utječemo od zla naših duša i naših loših djela. Koga Allah uputi, niko ga ne može u zabludu odvesti, a koga On ostavi u zabludi, niko ga ne može uputiti. Svjedočim da nema boga osim Allaha, jedinog, Koji nema sudruga, Njemu pripada vlast i hvala, On oživljava i umrtvljuje, i On je nad svime moćan. Svjedočim da je Muhammed Njegov rob i poslanik, kojeg je On poslao s uputom i pravom vjerom da bi je uzdigao iznad svih vjera, pa makar to mrzili mnogobošci. Neka su Allahovi blagoslovi i mir na njega, na njegovu porodicu i sve njegove ashabe.

Zaista je Allahova Knjiga najispravnija riječ i najbolji vodič, a sunnet Poslanika, sallallahu alejhi ve sellem, najbolji put i najpravedniji smjer. Najljepši primjer je u slijeđenju, a zabluda i stranputica su u novotariji. Zato se bojte Allaha u onome što vam je naredio i klonite se onoga što vam je zabranio: "O vi koji vjerujete, bojte se Allaha istinskom bogobojažnošću i nipošto ne umirite osim kao muslimani!" (Ali Imran, 102); "O vjernici, bojte se Allaha i govorite samo istinu, On će vas za vaša dobra djela nagraditi i grijehе vam vaše oprostiti. A onaj ko se Allahu i Poslaniku Njegovu bude pokoravao – postići će ono što bude želio" (El-Ahzab, 70–71).

O muslimani, namaz je najveća obaveza koju je Allah propisao nakon tevhida – obožavanja samo Njega; namaz je stub islama i drugi je od njegovih velikih temelja. Allah, džellešānuhu, kaže: "... a naređeno im je da se samo Allahu klanjaju, da Mu iskreno, kao pravovjerni, vjeru ispovijedaju, i da molitvu obavljaju, i da milostinju udjeljuju; a to je – ispravna vjera." (El-Bejjina, 5)

Ibn Omer, radijallahu anhumā, prenosi da je Poslanik, sallallahu alejhi ve sellem, rekao: "Islam se temelji na petero: svjedočenju da nema boga osim Allaha i da je





Muhammed Njegov poslanik, klanjanju namaza, davanju zekata, obavljanju hadža i postu mjeseca ramazana.”

Muaz ibn Džebel, radijallahu anhu, rekao je: “Poslanik, sallallahu alejhi ve sellem, poslao me je u Jemen i rekao: ‘Doći ćeš ljudima koji su sljedbenici Knjige. Pozovi ih da svjedoče da nema boga osim Allaha i da sam ja Allahov poslanik. Ako te poslušaju u tome, obavijesti ih da im je Allah propisao pet namaza svaki dan i noć. Ako te poslušaju i u tome, obavijesti ih da im je Allah propisao zekat koji se uzima od njihovih bogatih i daje njihovim siromašnima. Ako te poslušaju i u tome, pazi se njihove najbolje imovine i čuvaj se dove potlačenog, jer između nje i Allaha nema prepreke.’” (Muslim)

O vjernici, namaz je prvo za šta će čovjek biti pitan na Sudnjem danu. Ako mu namaz bude ispravan, uspjeh će i spasiti ga, a ako bude neispravan, propast će i bit će izgubljen. Ebu Hurejra, radijallahu anhu, prenosi da je Poslanik, sallallahu alejhi ve sellem, rekao: “Prvo djelo za koje će čovjek biti pitan na Sudnjem danu jeste namaz. Ako mu namaz bude ispravan, uspjeh će i spasiti ga, a ako bude pokvaren, propast će i bit će izgubljen. Ako mu bude nedostajalo nešto od obaveznih namaza, Allah će reći Svojim melekima, a On najbolje zna: ‘Pogledajte ima li Moj rob neki dobrovoljni namaz, pa dopunite ono što mu nedostaje od obaveznih namaza.’ Zatim će se sva djela mjeriti po tome.” (Tirmizi)

Ebu Davud također bilježi: “Allah će reći Svojim melekima, a On najbolje zna: ‘Pogledajte u namaz Mog roba, je li ga upotpunio ili je nešto izostavio.’ Ako je upotpunio, bit će mu upisan kao potpun, a ako je nešto izostavio, reći će: ‘Pogledajte ima li Moj rob neki dobrovoljni namaz.’ Ako bude imao dobrovoljni namaz, reći će: ‘Dopunite obavezni namaz iz njegovih dobrovoljnih namaza.’ Zatim će se i ostala djela mjeriti po tome.”

O muslimani! Allah je muslimanima propisao pet dnevnih namaza u toku dana i noći, i odredio im određena vremena. Uzvišeni Allah kaže: “... jer vjernicima je propisano da u određeno vrijeme namaz obavljaju” (En-Nisa, 103), tj. namaz je propisan u određenim, poznatim i tačno preciziranim vremenima, i nije dozvoljeno njegovo





odgađanje osim zbog opravdanog šerijatskog razloga. Ubada ibn Samit, radijallahu anhu, rekao je: "Svjedočim da sam čuo Poslanika, sallallahu alejhi ve sellem, kako kaže: 'Allah je propisao pet dnevnih namaza. Ko lijepo (potpuno) uzme abdest za njih, klanja ih u njihovo vrijeme i upotpuni njihov rukū i skrušenost, ima obećanje od Allaha da će mu oprostiti. A ko to ne učini, nema obećanje od Allaha, ako želi, oprostit će mu, a ako želi, kaznit će ga.'" (Ebu Davud) Abdullah ibn Mesud, radijallahu anhu, rekao je: "Upitao sam Poslanika, sallallahu alejhi ve sellem: 'Koje je djelo najbolje?', a on je rekao: 'Namaz u propisano vrijeme.' Upitao sam: 'Zatim koje?', a on je rekao: 'Dobročinstvo prema roditeljima.' Upitao sam: 'Zatim koje?' On je rekao: 'Džihad na Allahovom putu.'" (Muttefekun alejhi) Aiša, radijallahu anha, rekla je: "Nisam vidjela Poslanika, sallallahu alejhi ve sellem, da je odgađao namaz do kraja njegovog vremena, sve dok ga Allah nije uzeo Sebi." (Hakim)

O vjernici! Uzvišeni Allah upozorio je na opasnost odgađanja namaza izvan njegovog vremena iz nemara i nebrige i zaokupljenosti drugim stvarima. Uzvišeni Allah kaže: "A teško onima koji, kada molitvu obavljaju, molitvu svoju kako treba ne izvršavaju" (El-Maun, 4–5), to jest, zaboravljaju namaz do te mjere da im prođe njegovo vrijeme. Zato, pazite na namaz! Pazite na namaz! Pazite na namaz! Klanjajte ga na vrijeme, budite marljivi i čuvajte ga, i čuvajte se lijenosti u vezi s namazom i propuštanja njegovog vremena. Allah nas učinio od onih "koji Kur'an slušaju i slijede ono najljepše u njemu; njima je Allah na Pravi put ukazao i oni su pametni" (Ez-Zumer, 18).

Poštovani vjernici! Namaz je stub vjere, najveća od svih obaveza, najuzvišeniji od svih ibadeta i najčišća pobožnost. Roditelji su dužni da odgajaju djecu i podstiču ih na obavljanje namaza na vrijeme, i da im naređuju namaz i nadziru ih u tome. Uzvišeni Allah kaže: "Naredi čeljadi svojoj da namaz obavljaju i istraj u tome!" (Taha, 132)

Amr ibn Šuajb prenosi od svoga oca, a on od svog djeda da je Poslanik, sallallahu alejhi ve sellem, rekao: "Naređujte svojoj djeci namaz kada napune sedam godina, a





kada napune deset godina, budite strogi prema njima ako ga ne klanjaju i razdvojite ih u posteljama.” (Ebu Davud)

O ljudi, čuvanje namaza je najbolji pomagač u odgoju duša i njihovom čišćenju. Namaz osvjetljuje srce, čisti dušu i povećava iman i bogobožnost. Namaz je najbolji savjetnik i čuvar od grijeha. Uzvišeni Allah kaže: “Kazuj Knjigu koja ti se objavljuje i obavlja molitvu, molitva, zaista, odvraća od razvrata i od svega što je ružno; obavljanje molitve je najveća poslušnost! A Allah zna šta radite.” (El-Ankebut, 45)

Redovno i pravovremeno obavljanje namaza jedan je od najvećih razloga za uspjeh, najvažniji uzrok sigurnosti od straha i panike, i najveći uzrok nagrade i sevapa. Uzvišeni Allah kaže: “Postići će šta želi onaj koji se očisti i spomene ime Gospodara svoga pa molitvu obavi!” (El-A’la, 14–15)

Također kaže: “One koje vjeruju i čine dobra djela i molitvu obavljaju i zekat daju čeka nagrada kod Gospodara njihova; i ničega se oni neće bojati i ni za čim oni neće tugovati.” (El-Bekara, 277)

Ebu Hurejra, radijallahu anhu, prenosi da je Poslanik, sallallahu alejhi ve sellem, rekao: “Šta mislite kada bi neko od vas ispred vrata imao rijeku u kojoj bi se kupao pet puta dnevno, da li bi na njemu ostalo imalo prljavštine?” Prisutni odgovoriše: “Na njemu ne bi ostalo nimalo prljavštine.” Tada Poslanik, sallallahu alejhi ve sellem, reče: “To je primjer pet dnevnih namaza kojima Allah briše učinjene grijeha.” (Muttefekun alejhi)

Ebu Hurejra, radijallahu anhu, također prenosi da je Poslanik, sallallahu alejhi ve sellem, rekao: “Pet dnevnih namaza, džuma do džume, i ramazana do ramazana, brišu grijeha između njih, ako se ne počine veliki grijesi.” (Muslim)

I na kraju, obavljanje namaza jedna je od posljednjih oporuka Poslanika, sallallahu alejhi ve sellem, na samrti, dok se opraštao s ovim svijetom. Njegove posljednje riječi na ovom svijetu bile su: “Oporučujem vam namaz, i da pazite one koji su u vašem skrbništvu.” Enes, radijallahu anhu, prenosi: “Posljednja oporuka Poslanika, sallallahu alejhi ve sellem, kad je bio na samrti, bila je: ‘Oporučujem vam namaz i da





pazite one koji su u vašem skrbništvu.' To je ponavljao sve dok mu duša nije došla do grla i to više nije mogao izgovarati." (Ahmed)

Donosite salavate na Poslanika, sallallahu alejhi ve sellem, podarenu milost i nepresušnu blagodat, to vam je naredba od vašeg Gospodara, Koji je objavio: "Allah i meleki Njegovi blagosiljaju Vjerovjesnika. O vjernici, blagosiljajte ga i vi i šaljte mu pozdrav!" (El-Ahzab, 56)

Allah podario blagoslov meni i vama u časnom Kur'anu, i okoristio mene i vas njegovim ajetima i mudrom opomenom. Rekoh ovo i od Allaha Uzvišenog tražim oprost za sebe, vas i sve muslimane od svakog grijeha, a tražite i vi, On mnogo prašta i milostiv je.

